

# La crusch svizra vi dal zenn grond

Il commerzi cun la vopna svizra

DA CLAUDIA CADRUVI / ANR

■ **La crusch svizra è en moda. Quant ditg anc? Duas opiniuns.** Il boom cun la crusch svizra va vinavant, di *Reto Buser* dal Manor a Cuira. «Nus vain bunas cifras da vendita.» Dapi trais onns haja il Manor in swiss-shop cun vestgadira ed auters artitgels. «Fin uss n'avain nus senti nagut d'ina 'recessiun'.» Era tar las filialas a Sargans, Pfäffikon e Turitg sajan las cifras legravlas.

L'enviern vegnia il swiss-shop a far plaz a la vendita da nadal. Ma suenter porschia il Manor a Cuira puspè tuts artitgels cun l'emblem svizzer. «Igl è ina dumonda dal plaz. Sche nus avessan plaz, laschassan nus avert il shop sur onn.»

## Originalitad

Ma pertge marscha la fatschenta cun la crusch alva uschè bain? Las chaussas hajan ina tsherta originalitad, manegia Buser. «Ed ins vegn bain a dastgar star en per l'agen pajais!»

Da tutta glied cumpria chaussas en il swiss-shop, era glied pli passada. Ils t-shirts per uffants ch'els hajan gia en la grondezza 104 marschian bain.

Buser suppona plinavant ch'i dettia blers turists che cumprian gugent souvenirs.

## La marca «Alprausch»

D'in auter avis è *Yves Marti* da la Beach company SA. Sia fatschenta producescha dapi sis onns la vestgadira da la marca «Alprausch». Marti crai ch'els artitgels cun la crusch saja gia out. El pretenda schizunt ch'ins na chattia nagliur pli la crusch en stizuns da Turitg.



Il favorit dals uffants è la chapitscha cun la crusch. Las chapitschas da NY e dad adidas èn per il mument out.

FOTOS C. CADRUVI

Quai è sa chapescha surfatg. Perfin en sia atgna stizun vegnan vendidas bursas cun ina gronda crusch alva sin funs cotschen. Ma insatge è vair vi da la constataziun da Marti: La crusch svizra tar «Alprausch» è daventada pli pitschna ils ultims onns.

L'emprim haja «Alprausch» duvrà la crusch a moda placativa, raquinta il manader da fatschenta. «Sch'ins bajegia si ina marca, ston ins avair insatge che la glied enconuscha.» Ozendi

plazzescha «Alprausch» be pli a moda decanta la crusch, p.ex. en ses pitschen logo.

## Luvrar subtil cun la crusch

Persuenter profitescha «Alprausch» en il senn dal retro-look dad autras specialitads svizas. La marca gioga cun vegls musters e tagls dals onns sessanta cura ch'il sport da skis svizzer aveva ses megliers onns. Cun questas regurdanzas positivitas fa «Alprausch» bunas fatschentas

ed exportescha sia vestgadira en 18 pajais.

La maniera co ch'inqual firma ha commercialisà ils ultims onns la crusch svizra è in orrur per Yves Marti. «Per la vendita en l'exteriur fissi d'avantatg da sa servir anc pli fitg da la crusch. Ma nus na lain betg pender la crusch svizra vi dal zenn grond. Nus essan daventads fitg subtils en quel reguard.»

> PUNTG DA VISTA



Il classicher: Victorinox ha adina duvrà la crusch sco segn da qualitat.

## Danunder vegn la crusch svizra?

Pir dapi il 1815 è la crusch alva sin funs cotschen la vopna per l'entira Svizra. L'istorgia da la crusch cumenza en il 14avel tschientaner.

Per ch'els chavaliers possian far la differenza tranter ami ed inimi purtavon els vopnas. La crusch era in simbol che vegniva duvrà da pliras partidas.

I exista legendas che raquintan co che la crusch svizra è sa sviluppada. Segir è ch'els confederads da Sviz han gia baud purtà ina «bandiera da sang» cu-

ra ch'els gievan en la battaglia. Ins suppona che la crusch, en furma d'in pitschen crucifix, è cumparida en il 14avel tschientaner en questa bandiera.

L'emprima cumprova d'ina crusch alva han ins per la battaglia da Laupen il 1339 cura ch'els Bernais avevan ina tala crusch en lur vopna. Suenter è la crusch alva adina puspè cumparida sco simbol per ils confederads en la battaglia, ma sulet sco simbol integrà en las veglias vopnas dals singuls chantun u lieus.